

Toleo la 97/ Oktoba, 2020

Jarida la kilimo endelevu Afrika Mashariki

## Ukaushaji wa mahindi baada ya mavuno



Picha: MkM

Baada ya kuvuna mahindi, ni muhimu kuhakikisha unahifadhi sehemu salama

**Ili kupunguza upotevu na kudumisha ubora ni muhimu kuzingatianja bora za kukausha mahindi. Kukaushia nafaka ardhini husababisha kuoza na kuliwa na mchwa, hivyo kupelekeea upotevu na hata ubora kushuka.**

### Flora Laanyuni

Kuna njia mbali mbali za ukaushaji wa mazao ya mahindi mara baada ya mavuno kuzuia upotevu. Hata hivyo ukaushaji wa awali hufanyika mara tu mahindi yatolewapo shambani. Ukaushaji huu hufanyika kwa kuyaweka magunzi ya mahindi juu ya turubai, kichanja, sakafu au kribu.

Lengo la kukausha mahindi yakiwa kwenye magunzi ni kupunguza unyevu wa zao ili kurahisisha upukuchua. Kukausha kwenye kichanja mahindi yaliyotolewa maganda hutandazwa kwenye kichanja na kuachwa ili yakauke kwa nishati ya jua.

Ikiwa ni kipindi wakulima katika baadhi ya maeneo nchini Tanzania wanashughulika na uvunaji, *Mkulima Mbunifu* ilifanikiwa kutembelea wakulima wa kilimo hai Kwamderwa sisters,

wilayani Korogwe mkoani Tanga. *MkM* ilihamasika kushirikisha wakulima wengine juu ya uhifadhi wa mahindi katika kichanja kama hiki.

Katika mahindi hayo, wakulima hawa walitumia mmea wa muarobaini ambapo majani ya mmea huu yamekaushwa kusagwa na kurushwa katika kichanja hicho ili yasiweze kupekecha.

### Hata hivyo ni muhimu kizingatia yafuatayo:

Wakati wa kuvuna, wakulima wasifanye yafuatayo kuepuka kupoteza mahindi

- Kunapokuwa na mvua, vuna mahindi na magunzi yake kuepuka sumu ya aflatoxin.
- Mara moja ondoa na tengenya magunzi yaliyoathirika.
- Osha chombo kabla ya kuweka mahindi kuepuka kupata magonjwa kutoka kwenye mahindi ya msimu uliopita.
- Kupunguza maambukizi, hakikisha kuwa mazulia, magunia, au vibebia ni visafi na vikavu.
- Ikiwezekana vuna mahindi kipindi cha jua kali.

### Yaliyomo

Kilimo hai	2
Dawa za kuogesha mifugo	3
Faida lishe za karanga lozi	5



Lishe sahihi ya mbuzi	6
Faida za mradi wa ng'ombe	7

### Mpendwa Mkulima

Ni takribani miaka kumi (10) sasa toka tulipoanza kutoa elimu ya kilimo endelevu pamoja na ufugaji.

Elimu hiyo imekua na manufaa kwa jamii ya wakulima nchini Tanzania. *Mkulima Mbunifu* limeweza kuongeza elimu juu ya kilimo chenyetija na ufugaji bora wa mifugo ikiwa ni pamoja na kuzingatia usafi katika mchakato mzima wa kuzalisha mazao ya chakula na kuzifanya kaya kuwa na chakula cha uhakika.

Halikadhalika tumefanikiwa kufanya ushawishi wa hali ya juu na hata kufanikiwa kuona wakulima wakinufaika na elimu inayotolea na jarida hili la *Mkulima Mbunifu*, pale walipozingatia na kuona manufaa.

Jithada hizi zote zililenga kuhakikisha wakulima wanaweza kuzalisha kwa tija kwa kuthaminisha mazao yatokanayo na kilimo endelevu. Bidhaa hizi zimekua na faida kwani sasa mkulima anawenza kupambana kulifikia soko la kimataifa.

Pamoja na yote hayo na kwa kipindi chote hicho, tunaendelea kusisitiza uzalishaji na uhifadhi kwa njia za asili ambazo hazijumuishi hata chembe moja ya kemikali au njia zisizo za asili.

Ni vyema wakulima kufahamu kuwa, bila kufuata njia mbalimbali za asili kama zinavyoainishwa katika makala zilizochapishwa katika jarida hili, hata Maisha yao yatakuwa ya mashaka kutokana na madhara kadha wa kadha yanayotokana na njia zinazojumuisha matumizi ya kemikali.

*MkM* linasisitiza wakulima kuhakikisha wanaweka jithada nyingi katika kuzalisha bidhaa zinazokubalika sokoni kwa kuzingatia mifumo ya kiasili.

## Kilimo hai chapata mwitikio mkubwa nchini Tanzania



*Kilimo hai kinahitaji mbolea hai kama mboji ili iweze kuzalisha mazao kwa tija*

**Maswali ni mengi kwa jamii ya wakulima na hata wasio wakulima kuhusu kilimo hai. Baadhi ya wakulima bado wanajiliza na kutaka kujua kinagaubaga, hasa nini hiki kinavutia watu kufanya kilimo hai na faida yake, tofauti na kilimo cha kawaida.**

### **Erica Rugabandana**

Mkulima Mbunifu imeendelea kutoa Makala mbalimbali juu ya kilimo hai. Moja ya chachu za kilimo hai ni bunifu mbalimbali zinazofanywa na wakulima wadogo wadogo ili kuboresha maisha yao kwa kuzalisha mazao bora kwa wingi ili kukidhi mahitaji.

Katika Makala hii, Mkulima Mbunifu ilitembelea nyumba ya watawa kwam-dorwa, wilayani Korogwe mkoa wa Tanga. Moja ya shughuli wanazo fanya ni kilimo hai.

Mkulima Mbunifu ilitembelea bustani ya mboga mboga kutaka kujiridhisha na shughuli za kilimo cha mboga mboga jinsi kinavyofanyika kwa njia ya kilimo hai.

### **Katika utekelezaji wa kilimo hai, sifa kuu za shamba la kilimo hai ni;**

Matumizi ya mbolea ya mboji, kupanda mazao mchanganyiko, matumizi ya viuatalifu vya kiasili/kibaiolojia kuzuia wadudu na hata kurutubisha udongo. Pia matumizi ya mbinu za kilimo

kama matuta ya michimbui miwili ili kuhifadhi rutuba kwa muda mrefu. Mashimo ya zai na pia kufunika udongo (*mulching*) ili kutunza unyevu, ni mbinu ambazo zimekuwa na faida katika kilimo hai

### **Mbolea ya maji:**

MkM iliweza kushuhudia mbolea hii ikitengenezwa kwa kinyesi cha ng'ombe (Kilo 50) na kuwekwa ndani ya mfuko wa salfeti na kuning'inizwa katika kijiti ndani ya jaba lenye maji kwa muda wa siku 21. Mbolea hio hutingishwa kila baada ya siku saba (7) kama tunavyoona katika picha. Mbolea hii inatumika kama kirutubishi na pia kama kiuatilifu.



*Nyanyua juu mfuko wa mbolea ili mbolea iweze kujichuja kwenye maji*

### **Mbolea ya samadi:**

Mbolea ya samadi ni muhimu katika kilimo hai kwani ina madini na virutubishi stahiki kwa mmea. Mbolea hii inahitaji miezi miwili kukamilika. Ina-

jumuisha matumizi ya majani makavu, udongo, majivu, mbolea (kinyesi cha mnyama (ng'ombe/mbuzi/nguruwe/ kuku) kilichoiva, majani mabichi na maji. Unaweza kutengeneza safu tofauti hadi kufikia mita mbili kulingana na uhitaji.



*Mbolea ya samadi iliyotayari kutumika*

### **Kufunika udongo (Mulching)**

Katika kilimo hai ni muhimu kufunika udongo kwani inasaidia kutunza unyevunyevu, kuzuia mmea usipatwe na magonjwa, inazuia magugu kuota.



*Matandazo hutunza unyevunyevu na rutuba udongo ukufunikwa*

### **Kupanda mazao tofauti**

Kilimo hai kinashauri upandaji wa mazao tofauti tofauti kama tunavyoona katika tuta hili, kwani mazao kama vitunguu husaidia kufukuza wadudu.



*Panda mimea tofauti tofauti kwa mpangilio katika tuta*

## Fahamu makundi ya dawa salama za kuogesha mifugo

*Magonjwa yaenezwayo na kupe yanababisha zaidi ya asilimia sabinu na mbili (72%) ya vifo vyote vya ng'ombe vinavyotokea kila mwaka. Magonjwa hayo ni Ndigana Kali (East Coast Fever - ECF), Ndigana Baridi (Anaplasmosis), Mkojo Mwekundu (Babesiosis) na Maji ya Moyo (Heart-water).*

### Linus Prosper

Katika Makala hii tutaangazia dawa za kuogesha mifugo. Dawa za kuogesha mifugo zimegawanyika katika makundi manne (4) ambayo ni Amitraz, Synthetic pyrethroids, Organophosphates na mchanganyiko wa Synthetic pyrethroids na Organophosphates.

Mfano wa dawa za kuogesha mifugo zilizopo katika kundi la Amitraz ni Norotraz, Twigatraz, Bamatraz, Alphatix, Tixfix n.k.



Picha: IN

Mfano wa dawa za kuogesha mifugo zilizopo katika kundi la Mchanganyiko wa Synthetic pyrethroids na Organophosphates ni DuoDip n.k.



Picha: IN

Tunaposema dawa za kuogesha mifugo mfano Paranex, Albadip, Dominex, Tantic, Cybadip, Ectomin na Vectocid zipo katika kundi moja liitwalo Synthetic pyrethroids ina maana kwamba:-

- Dawa hizi zina kiambata kinachofanana kinachoua kupe
- Dawa hizi zina mfumo unaofanana wa kufanya kazi
- Kama dawa mojawapo katika hili kundi ikishindwa kuua kupe ina maana dawa zote katika hili kundi zitakuwa haziwezi kuua kupe
- Pale dawa ya kuogesha mifugo iliyopo katika kundi moja inaposhindwa kuua kupe kuto-kana na usugu wa kupe ni kosa kubadilisha dawa hiyo na dawa nyingine iliyopo katika kundi hilohilo.

Ili kudhibiti usugu wa kupe dhidi ya dawa za kuogesha mifugo ni vizuri mfugaji akawa anabadilisha dawa za kuogesha mifugo kwa kufuata mzunguko wa makundi haya manne ya dawa za kuogesha mifugo (Acaricide rotation).

Mfano mfugaji akitumia dawa ya kuogesha mifugo iliyopo katika kundi la Organophosphate, baada ya muda anatakiwa abadilishe dawa na kutumia dawa ya kuogesha mifugo ya kundi lingine mfano ya kundi la Synthetic py-

rethroids.

Ni vizuri wafugaji kwa kushirikiana na wataalam wa mifugo waliopo katika maeneo yao kutambua aina ya kupe waliopo katika maeneo hayo. Hii itafanyika kwa kuchukua sampuli ya kupe waliopo katika maeneo yao na kupeleka kwa wakala wa maabara ya Veterinari Tanzania (TVLA) kwa ajili ya utambuzi. Jambo hili litasaidia:-

- Kujua aina ya kupe waliopo katika eneo husika
- Kujua ni kundi lipi la dawa za kuogesha mifugo linaweza kuua kupe waliopo katika eneo husika
- Kujua mzunguko mzuri utakao-tumia wakati wa kubadilisha makundi ya dawa za kuogesha mifugo (*effective acaricides rotation*)
- Kudhibiti vizuri kupe na kupunguza magonjwa yaenezwayo na kupe
- Kupunguza upotevu wa fedha

Faida za kutumia dawa za kuogesha mifugo kwa kuzingatia mzunguko wa makundi ya dawa za kuogesha mifugo (*acaricide rotation*) ni:-

- Kutokubadilisha dawa ya kuogesha mifugo kwa kuangalia jina la kibiashara la dawa.
- Inahakikisha kundi moja tu la dawa ya kuogesha mifugo linatumika kwa muda fulani wakati makundi mengine ya dawa za kuogesha mifugo yatatumika baadaye.
- Kupunguza usugu wa kupe dhidi ya dawa za kuogesha mifugo.

### Mfugaji zingatia yafuatayo unapotumia dawa za kuogesha mifugo:-

Dawa za kuogesha mifugo zilizopo katika kundi la Amitraz hazitumiki kuogesha farasi, punda na paka.

Unapotumia dawa za kuogesha mifugo hakikisha umevaa vifaa kinga kama vile kiziba uso (masks), gloves, koti, buti n.k.

**Makala hii imeandalishi na Dkt. Linus Prosper (Arusha DC). Kwa mawasiliano piga 0756 663 247**



Picha: IN

Mfano wa dawa za kuogesha mifugo zilizopo katika kundi la Synthetic pyrethroids ni Paranex, Albadip, Dominex, Tantic, Cybadip, Ectomin, Vectocid, Tantix, Ecotix n.k.



Picha: IN

Mfano wa dawa za kuogesha mifugo zilizopo katika kundi la Organophosphates ni Steladone n.k.

## Ujue uzio wa kibaolojia na faida zake kwa wakulima



*Uzipo wa kibaolojia ni muhimu shambani kwani hukinga mazao na uharibifu mbalimbali*

Picha: MKM

**Uzio wa kibaolojia (Bio-fencing) ni uzio unaotumia mimea asili yenye faida katika shamba la kilimo hai.**

*Erica Rugabandana*

Mimea mbalimbali inaweza kutumika kutengeneza uzio wa shamba lako kwa lengo la kuzuua uharibifu. Hata hivyo ni vyema kuzingatia aina ya mimea hiyo.

Mimea hiyo inaweza kuwa kama miti yenye miba miba kama vile buganivilia, miti ya matunda kama michungwa, milimao, miti ya dawa kama muarobaini na mimea mingine ambayo inaweza kuchangia katika ulinzi wa shamba.

Uzio wa kibaolojia kwa sababu hutumia mimea asili. Mimea katika uzio huu hasa safu ya kwanza upandwa kwa kusonganishwa ili iweze kufungamana kama mmea wa buganivilia. Ikisha shikamana inakua vigumu kuruhusu uharibifu shambani kutoptana na watu na hata wanyama kama mbuzi, ng'ombe.

Mmea wa buganivilia hufanya ulinzi mzuri, mmea huu unapatikana katika aina tofauti tofauti, yenye rangi tofauti hivyo kufanya uzio kuvutia.

### Jinsi ya kupanda

Chimba mfereji, weka mbolea ya mboji, funika na udongo kiasi. Anza kupandikiza vijiti vya bouganvillea vyenye urefu wa mita moja kila baada ya nusu mita kuzunguka shamba lako. Baada ya kupandikiza weka matandazo na umwagilie maji ya kutosha kufuatana na unyevunyevu uliopo shambani.

Mstari unaofuata pima mita moja pandikiza miti mbalimbali ya matunda yanayopatikana katika eneo unaloishi. Miti hiyo inaweza kuwa kama machungwa, malimao, muarobaini, mlonge, lucina, mapapai na mengineyo. Rudia kwa mistari mingine mbele.

**Kumbuka:** Katika upandaji wa miti, pima mita mbili kutoka mche hadi mche. Na mita moja kutoka mstari hadi mstari. Uzio wako usizidi mita nne kwa upana, hata hivyo inategemea na ukubwa wa eneo lako.

### Jinsi ya kuzuia mti wa mwanzi usiharibiwe na mchwa

Katika uzio kama utatumia mti wa muanzi, tengeneza mchanganyiko ufuatao ili kuipaka mianzi yako sehemu ya chini isiharibiwe na mchwa

- *Baking powder* kijiko kimoja cha chakula (1tbsp)
- Mafuta ya taa nusu lita (1/2L)
- Maji nusu lita (1/2L)
- Sabuni vijiko vinne (4) vya chakula (4+bsp)
- Miti ya mianzi iliokauka vizuri
- Changanya vizuri, paka mianzi

yako upande utakao chimbiwa ardhini na mita 1 juu.

- Choma vizuri kwa koroboi, ile *glucose* (sukari) katika safu ya juu ya muanzi itaungua na harufu hio inafukuza mchwa.

**MUHIMU:** Uzio huu utachukua muda kuota, ila baada ya mimea kukua hauhitaji marekebisho sana. Sehemu wazi hufidiwa kwa kupanda mimea mingine.



Picha: IN



Picha: IN



Picha: IN



Picha: IN

### Faida za uzio wa kibaolojia

Uzio huu *Bio-fencing* unafaida kwa mkulima kama ifuatavyo;

- Uzio huu hauna gharama kubwa
- Rafiki wa mazingira
- Inazalisha mapato mbadala kwa mkulima, kama matunda, kuvuna mbao, kurina asali iwapo utafuga nyuki
- Inauwezo wa kuzalisha zaidi ya mimea 100
- Inasaidia kuzuia moto na upepo
- Inazuia mmo
- monyoko wa udongo
- Inaweza kuishi wakati wa joto kali na hata jua kali
- Uzio huu ni endelevu vizazi hata vizazi

# Fahamu kuhusu karanga za lozi na faida zake


*Almonds au lozi ni jamii ya karanga zinazovunwa kutoka katika miti mikubwa kama ya mikorosho na karanga hizi ni lishe ambayo inaweza kutumika kwa kupikia au kula kama zilivyo. Asilimia thelathini ya lozi duniani hupandwa huko California kutokana na kupenda hali ya hewa ya Mediterranean. Aidha, huliwa zaidi maeneo ya kusini mwa Ulaya, Kaskazini mwa Afrika, na baadhi ya nchi za Mashariki ya Kati.*

## Rajabu Lipamba

Almond ina virutubisho vingi na ni chanzo kizuri cha nyuzinyuzi, protini na mafuta mazuri. Pia, ni chanzo bora cha vitamini E, manganizi, na magnesia.



Almondi zikiwa kwenye mapodo mtini



Karanga za almondi zikiwa tayari kwaajili ya matumizi mbalimbali

Picha: IN

## Faida za karanga za lozi

- Zina kiwango kidogo cha wanga hivyo inafanya zitumike kwa uhuru kwa wagonjwa wenye kisukari, presha, uzito mkubwa, kitambi, pumu, ugumba na yejote anayetaka kupunguza matumizi ya wanga na sukari
- Unga wa karanga za almondi unaweza kuutumia kutengeneza mikate, keki, mandazi kwa wagonjwa wote wanaoteseka na magonjwa ya lishe, hutumika kama mbadala wa ngano
- Unapozitumia haziwezi kukuletea gesi yoyote, Unaweza kula jinsi zilivyo, unaweza kuzisaga ukatengeneza kitafunywa upendacho na humeng'enywa vizuri kwenye mfumo wa chakula bila kukuletea gesi
- Zimeonesha uwezo mkubwa wa Kurudisha afya ya mwili kwa wanaoteswa na kisukari, presha, pumu ndani ya muda mfupi endapo akitekeleza pamoja na sayansi ya mapishi.
- Kiwango kingi cha magnesia ndani yake, hupatia mwili na kuwezesha mishipa ya damu kusukuma damu vizuri na kwa ufanisi mkubwa.



Maziwa ya almondi

Picha: IN

- Zina kiwango kingi cha mafuta mazuri yaani *Omega 3*, husaidia kutibu majeraha ya mwili, kulainisha mishipa ya damu na kutibu majeraha yake, Na husaidia sana mtu mwenye magonjwa ya mashambulizi ya mwili kama pumu, baridi yabisi, presha, pumu ya ngozi nk.
- Hukata njaa haraka sana kwa saba-



Karanga za almondi baada ya kubanguliwa

# Ufugaji wa mbuzi hutegemea lishe bora



Uzalishaji wa mbuzi hutegemeza zaidi upatikanaji wa malisho bora msimu wote wa ufugaji

**Ufugaji wa mbuzi ni moja ya miradi ya ufugaji rahisi lakini yeny chagamoto nyngi ikiwa mfugaji hataz-ingatia maswala muhimu yanayohitajika kufuatwa kwa usahihi katika mradi huu hasa juu ya lishe.**

## Method Charles

Kama mfugaji makini, hakikisha unafahamu namna na nini cha kulisha mbuzi ili uweze kufanya ufugaji weny tija na utakaokupatia kipato sahihi kulingana na uzalishaji unaofanya.

## Baadhi ya vidokezo muhimu

Kwa asili mbuzi ni watafutaji binasi wazuri wa malisho. Mbinu bora ya ulishaji wa mbuzi ni kuhakikisha wanapata malisho mazuri kwasababu afya na ukuaji wa mbuzi hudorora kwa ufugaji wa ndani.

Mbuzi wanapaswa kulishwa mara tatu kila siku, na maji yakipatikana wakati wote.

Mbuzi weny afya dhaifu wanapaswa kutengwa na wale weny afya imara.



Chakula cha mbuzi kilichokaushwa

Baada ya kuzaliwa tu, watoto wa mbuzi wanapaswa kunyonya maziwa ya mama kwa takribani muda wa daki-ka 20 mpaka 30.

Maziwa huwa na harufu mbaya kama mbuzi atalishwa kwenye malisho yeny harufu au kama mbuzi jike

hutunzwa pamoja na mabeberu.



## Lishe ya mbuzi

Mbuzi wanaolishwa vizuri huzalisha maziwa na nyama zaidi. Mbuzi jike katika mwezi wa mwisho kabla ya kuzaa anahitaji protini na vyakula vyenye nguvu zaidi ya mbuzi wa kawaida.

## Maji

- Mbuzi wa maziwa wanahitaji angalau lita 3-8 za maji masafi katika kipindi sahihi.
- Mbuzi wanaokula malisho makavu huhitaji zaidi maji kupata nguvu.
- Vyakula vya nishati kama vile mizizi, ndizi, molasi, matunda, na keki ya mafuta huhakikisha kwamba mbuzi wapo hai muda wote.
- Soya, pamba, alizeti, karanga na nazi hutoa nguvu mara 2 - 3 zaidi ya vyakula vya wanga kama majani na matawi ya miti.

## Protini

- Mbuzi huhitaji protini zaidi kuliko ile waipatayo katika malisho.
- Majani ya kijani, njegere na maganda ya mgunga, soya, pamba, njugu, na majani kutoka leucaena, sesbania, na gliciridia ni vyanzo vizuri vya protini.
- Takataka za kuku ni chanzo kingine kizuri cha protini.

## Madini

- Mbuzi wanahitaji kalsiamu, sodiamu, fosforasi, chuma, shaba na aiyodini.
- Kijani cha majani ya miti, vichaka, na mbegu ya nafaka ni vyanzo vizuri vya fosforasi na kalsiamu.
- Majani yeny weusi ni vyanzo vizuri vya madini ya chuma.
- Mbuzi wenye ukosefu wa madini ya aiyodini wanaweza kuzaa wato-to dhaifu, walioharibika na njiti.

## Vitaminini

- Mbuzi wenye upungufu wa vitaminini A hukabiliwa na matatizo ya macho, maambukizo ya ngozi na matatizo ya kupumua na shida katika mimeng' enyo ya chakula.
- Mbuzi wenye upungufu wa vitaminin huzaa watoto dhaifu.
- Pale mbuzi wanapokuwa katika malisho, hupata vitamini mbalimbali kutoka katika mimea wanayo kula.
- Viazi vitamu hutoa zaidi vitamini A na majani ya viazi hivyo vitamu hutoa vitamini C.

## Kulisha mbuzi kwa ajili ya soko la nyama

Miezi mitatu baada ya kuachishwa, mbuzi watoto wanapaswa kuwa na uzito wa kilo 15, kutegemea na aina ya mbuzi na mfumo wa ulishaji.



Beberu kwa ajili ya soko la nyama wanaweza kuhasiwa kutoka wiki mbili mpaka miezi miwili ya umri ili kupata uzito zaidi.

Beberu hulishwa mara mbili kwa siku na nusu kilo ya protini kuongeza uzito wao na kupata mapato zaidi katika masoko ya nyama.

**Makala hii imetolewa katika tovuti ya "farm radio international" namba 106 kipengele cha 8.**

# Mkulima Mbunifu imeniongezea uthubutu



Bw.Mosha akiwa na mkewe Bi.Glory katika banda la mradi wao wa ng'ombe wa maziwa

**Wengi waliofanikiwa katika maisha na kusonga mbele katika shughuli za kijamii ikiwemo kilimo na ufugaji waliweza kusimamia msemo huu, "uthubutu wako ndiyo utajiri wako, na uoga wako ndiyo umaskini wako".**

### Flora Laanyuni

Bw. Nguma Mosha na Bi. Glory Mosha wa Kiutu, kata ya Sekei mkoani Arusha, wamedhihirisha kwa vitendo kuwa bila uthubutu huwezi kufanikiwa na ukisita mwisho ni kutokufanya kabisa.

"Kwanza tunapenda kushukuru sana jarida la *Mkulima Mbunifu*, kupitia kwa Afisa kilimo wetu Bw. Linus Prosper kwani tulipoanza kulipokea mwaka 2018 lilituongezea uthubutu na ari ya kufanya mradi wa ufugaji wa ng'ombe hasa baada ya kusoma makala ya Bw. Alfayo Mollel pamoja na makala zingine za ufugaji wa ng'ombe". Aliesema Mosha.

Bw. Mosha alianza ufugaji mwaka 2012, japo anajishughulisha na ujenzi lakini MkM ilimhamasisha kupanua mradi wake ili kuweka nguvu na kufanya kwa umakini zaidi akilenga soko kubwa.

Bw. Mosha (47) anaeleza kuwa, walianza kwa kufuga ng'ombe wawili kwa lengo la kujipatia maziwa kwa ajili ya familia. Baadaye waliongeza ng'ombe baada ya kupata soko kutoka kwa watu waliomzunguka jambo ambalo aliendelea nalo kwa muda mrefu na hata kufikia kuanza kuuza ndama, na ng'ombe wakubwa hasa madume.

Anasema kuwa, katika ufugaji huo alikumbana na changamoto ya uharibifu wa majani hasa wakati akilisha majani makavu kwani sehemu ya majani hasa mashina ng'ombe huacha kula na kuwa mabaki/taka.

"Nilianza kufikiri namna ya kutatta changamoto hii na kupitia mitando niliona mashine za kusaga majani hivyo nikaanza kutafuta msaada wa kutengenezewa mashine hiyo katika mashirika baadhi bila mafanikio na baadaye nikaamua kutengeneza mwenye jambo ambalo nilifanikiwa" alisema.

### Faida za ufugaji

Bw. Mosha anasema kuwa, amepata faida kupitia ufugaji wa ng'ombe ikiwa ni pamoja na;

- Fedha taslimu zinazotokana na uuzaji wa ndama, madume na maziwa, na kuweza kusomesha

watoto wake hadi ngazi ya chuo kikuu

- Maziwa kwa ajili ya familia yake
- Biogas inayotokana na kinyesi cha ng'ombe
- Mbolea ya bioslari inayotokana na mtambo wa biogas
- Kuongeza eneo na kujenga nyumba za wapangaji
- Mazao bora shambani kutokana na mbolea ya mifugo

### Changamoto

Bw. Mosha anaeleza kuwa, pamoja na faida, kuna changamoto kama vile;


- Ukosefu wa majani wakati mwingine na gharama za usafiri
- Kusuasua kwa soko la maziwa
- Ukosefu wa madaktari wa mifugo wa karibu katika kata
- Madini ya mifugo wakati mwingine hayana ubora na zenyne ubora huuzwa kwa bei kubwa

### Ushauri kwa wafugaji

"Nawashauri wafugaji wa ng'ombe na hata ambao hawafugi kuwa wathubutu kufanya jambo wasikate tamaa kwani ufugaji wa ng'ombe ukitilia mkazo unalipa" alisema Mosha

### Wito kwa MkM

MkM imenifungua kwa mambo mengi juu ya ufugaji na kwasasa nategemea kuanza kusindika maziwa kwa kuzalisha mtindi. Nawaomba wajitahidi kufikisha elimu hii kwa wakulima wengi na kuzidi kutuunganisha kuwa wamoja kwani kuna faida kulisoma jarida hili.



Bw.Mosha na mkewe Bi.Glory wakisoma nakala mbalimbali za *Mkulima Mbunifu*

## Maoni wanufaika wa jarida la MkM kwa njia ya barua pepe



Picha: MkM

Wanufaika wa jarida la MkM wakijadili taarifa mbalimbali zilizopo kwenye jarida na kutoa maoni

**Tumekuwa tukisambaza jarida hili kwa wakulima na wafugaji kwa kutumia njia mbalimbali ikiwemo nakala ngumu, njia ya barua pepe na hata mitando mbalimbali ya kijamii.**

### MkM

Wanufaika wa jarida hili wamekuwa wakiturudia kwa kutoa pongezi, shukrani, ushauri na maswali pale wanapoona vyema kufanya hivyo.

Katika maoni hayo, tumewenza kuchapisha baadhi ili wasomaji wengine waendelee kupata hamasa ya kusoma jarida hili mara kwa mara pindi linapotoka na kujifunza zaidi kuhusu kilimo na ufugaji.

### Kim Meth

Asante sana *Mkulima Mbunifu*. Nimelipokea jarida la mwezi Septemba na nimependa utangulizi wake hasa huo msemo wa "Nia madhubuti hukidhi haja maridhawa", unatia nguvu sana.

### John Richard Mbwambo

Asante sana *Mkulima Mbunifu* kwa jarida hili. Hili ni jambo zuri na nimesoma makala zake ni za kuvutia na zenye kujenga sana.

Natoa pongezi nydingi kwa wahariri kwani mnatuletea taarifa kwa karibu.

Tunategemea kuchangia makala zetu wakati fulani hasa za kilimo mseto.

### James Kahurananga

Salaam *Mkulima Mbunifu*. Tunashukuru kwa kutumiwa nakala ya jarida hili kwani limekuwa msaada mkubwa kwetu wakulima wadogo. Binafsi nitemumia mbinu mbalimbali zilizoelekezwa kwenye jarida hili kuongeza uzalishaji katika bustani yangu.

### Mohammed Mohammed

Salaam *Mkulima Mbunifu*. Nashukuru kwa nakala za jarida mliyonitumia kwa njia ya barua pepe.

Nafarijika sana na taaluma mnayoitaoa kuelimisha juu ya ukulima ambao umejigawa katika njia tofauti.

Mimi ni mkulima katika kitengo cha ufugaji kuku wa mayai na hivi sasa nimeanza kilimo na ufugaji wa samaki wa chakula Zanzibar.

Nafuatilia sana juu ya taaluma ya kilimo ili kupata kujua na kufahamu matatizo na changamoto zilizopo au zinazoweza kujitekeza katika kilimo na hii ndio iliyonifanya niweze kujiunga kupata jarida la kilimo kutoka kwenu.

### Nsanzu Gwanko

Salaam kutoka Shinyanga. Mimi ni Afisa ugani na eneo langu la kazi ni kata ya Ibadakuli, Manispaa ya Shinyanga.

Mkulima Mbunifu kwenye mtandao

Aidha, nafanya kazi na taasisi inayoitwa *Benevolent Institute of Development Initiatives in Tanzania (BIDI-TANZANIA)* inayojishughulisha na kutoa elimu ya ugani kwa wakulima na wafugaji.

Tunaomba kama kutakuwa na majarida au vipeperushi vyta Mkulima Mbunifu (yaani nakala ngumu) tuwasiliane kama naweza kutumiwa kwa ajili ya kuendelea kuwajengea uwezo wakulima waliopo kwenye vikundi vyta wakulima na mifugo.

### Eliengera Mghase

Asante sana *Mkulima Mbunifu* kwa kunitumia nakala. Mimi ni mfugaji na nilipenda kujifunza juu ya ufugaji wa kuku ndiyo maana nikawa natafuta msaada kwenye mitandao.

Kipekee nawashukuru kwa elimu yenu nzuri ya ukulima na kama mtakwaa na chochote kizuri kuhusiana na ufugaji wa kuku tafadhali msisite kuni-fundisha.

### Kimamba Lyoba

Asante sana *Mkulima Mbunifu*. Mimi ni afisa kilimo mkuu mstaafu na ni msomaji wa jarida hili. Kwasasa natumia jarida hili kutoa elimu kwa wastaafu wenzangu wanaofanya kilimo.

### Angelo Mwilawa

Habari *Mkulima Mbunifu*, tunapenda kuwashukuru sana na tunakiri kupokea majarida yenu ikiwemo jarida la Septemba, ni zuri sana na hongereni.

Tutaendelea kufuatilia makala zingine ili kujua ni juhudzi zipi tutazifanya ili tupate ubunifu mzuri wa ufugaji, tunashukuru sana.

### Ndugu Mollel

Habari, tunashukuru sana kwa msaada wenu wa nakala za mkulima mbunifu. Tunawaahidi kusambaza elimu hii kwa wakulima wetu pamoja na wadau wengine wanaosaidia wakulima katika vijiji vyetu.